



TEKS UCAPAN

**YB DATO' SRI HAJAH NANCY BINTI SHUKRI
MENTERI PEMBANGUNAN WANITA, KELUARGA DAN
MASYARAKAT**

**PROGRAM JERAYAWARA KASIH KPWKM
@ADVOKASI ANTIGANGGUAN SEKSUAL NEGERI SEMBILAN**

**CASA LAGENDA CONVENTION CENTRE, SEREMBAN,
NEGERI SEMBILAN
10 OGOS 2023 (KHAMIS) / 10.15 pagi**

Kemaskini 9 Ogos 2023

Bismillahir Rahmanir Rahim

Assalamualaikum Warahmatullahi Wabarakatuh,
Salam Sejahtera dan Salam Malaysia Madani.

(SALUTASI)

LAMPIRAN SALUTASI DISEDIAKAN

(A) PENDAHULUAN

1. Alhamdulillah, Segala Puji Bagi Allah SWT, Tuhan sekalian alam kerana dengan limpah kurniaNya dapat kita berkumpul pada pagi ini dalam **Program Jerayawara Kasih KPWKM @Advokasi Antigangguan Seksual Negeri Sembilan.**
2. Pertama sekali, saya ingin menyampaikan setinggi-tinggi penghargaan dan ucapan terima kasih kepada semua Ahli-ahli Yang Berhormat, Ketua-Ketua Jabatan Kerajaan Negeri Sembilan, wakil-wakil Kerajaan Persekutuan, badan-

badan korporat, persatuan majikan dan sekerja, badan bukan kerajaan (NGO) serta rakyat Negeri Sembilan yang turut hadir pada pagi ini.

3. Sesungguhnya, kehadiran tuan-tuan dan puan-puan pada pagi ini **menunjukkan solidariti, sokongan** serta **kebersamaan dalam menyokong agenda kesejahteraan masyarakat bagi mencapai persekitaran yang selamat dan kondusif untuk semua.**

LATAR BELAKANG

Puan-puan, tuan-tuan, hadirin yang saya kasihi sekalian.

4. Isu gangguan seksual bukanlah sesuatu yang baharu. Oleh itu, kita perlu sentiasa menambahbaik undang-undang semasa agar sesuai dengan peredaran masa. Kini, gangguan seksual bukan sahaja berlaku secara fizikal tetapi juga atas talian atau online.
5. Walaupun masalah ini bukan perkara yang mudah untuk ditangani, adalah sangat penting dan mustahak untuk kita

menguar-uarkan dan teruskan perbincangan **isu gangguan seksual serta isu jenayah intip dan hendap atau 'stalking'**.

6. Kesan kepada **mangsa atau** istilah yang lebih tepat, **pemandiri gangguan seksual,** tidak terhad pada gangguan mental sahaja. Ianya juga boleh mendorong jenayah seksual yang lebih serius dan kesannya terhadap pemandiri adalah sangat negatif, termasuk trauma dan ketakutan yang berpanjangan.

7. **Pada kebiasaannya pelaku gangguan seksual mungkin merasakan perbuatannya sebagai satu gurauan ataupun usikan. Namun sebaliknya, ianya merupakan gangguan seksual yang memberikan kesan negatif kepada pemandiri.**

8. Gangguan seksual boleh berlaku di mana-mana, kepada sesiapa sahaja, tanpa mengira jantina, usia, kaum, atau agama.

9. Menurut statistik yang dilaporkan oleh Polis Diraja Malaysia (PDRM), jumlah kes gangguan seksual yang dilaporkan meningkat dari **378 kes pada 2020 dan seterusnya meningkat kepada 506 kes pada 2021**. Jumlah kes yang dilaporkan ini adalah melibatkan kedua-dua jantina, lelaki dan wanita.

10. Walau bagaimanapun, data menunjukkan majoriti kes yang dilaporkan **melibatkan pemandiri wanita berbanding lelaki**.

11. Bagi negeri Sembilan sendiri, pada tahun 2022, **terdapat 19 kes gangguan seksual di mana 16 kes atau 84 peratus adalah melibatkan gangguan seksual terhadap kaum wanita. (3 adalah pemandiri lelaki).**

12. Selain itu, kes gangguan seksual yang melibatkan kanak-kanak juga adalah membimbangkan iaitu berjumlah **35 kes pada tahun 2022 di seluruh negara**. Bagi Negeri Sembilan pula, jumlah kes gangguan seksual yang melibatkan kanak-kanak juga adalah antara yang tertinggi iaitu 2 kes.

13. Statistik ini menunjukkan bahawa gangguan seksual boleh terjadi di mana – mana sahaja, dalam apa jua bentuk dan kepada mana-mana individu tanpa mengira jantina, usia, kaum ataupun agama.

14. Apabila seseorang berasa tidak selesa dengan usikan seksual oleh pelaku maka di sinilah bermulanya gangguan seksual. **Kebiasaannya perlakuan ini dilakukan oleh individu yang lebih berkuasa dan ianya kerap berlaku di tempat kerja.**

15. Pengendalian kes gangguan seksual juga bukanlah sesuatu yang mudah kerana **pemandiri mungkin sensitif atau putus asa sekiranya tiada saksi yang tampil membantu.**

16. Oleh itu, Kementerian Pembangunan Wanita, Keluarga dan Masyarakat (KPWKM) telah menggubal **Akta Antigangguan Seksual 2022 [Akta 840]**, sebagai suatu Akta khusus untuk menangani kesalahan gangguan seksual.

17. Akta ini diharap dapat membantu pemandiri untuk tampil melaporkan kejadian gangguan seksual supaya tindakan dapat diambil dengan sewajarnya dan remedi dapat diberikan kepada pemandiri.

18. **Penguatkuasaan Akta** ini telah dilaksanakan **secara berperingkat mulai 28 Mac 2023** yang melibatkan takrifan gangguan seksual dan elemen kesedaran, pendidikan serta pemahaman mengenai gangguan seksual kepada masyarakat.

19. Semasa Sambutan Hari Wanita Antarabangsa pada 8 Mac 2023, **YAB Perdana Menteri telah mengumumkan inisiatif Garis Panduan Pelaksanaan Program Advokasi Antigangguan Seksual.**

20. Ini menunjukkan **kesungguhan Kerajaan yang diterajui oleh Yang Amat Berhormat Perdana Menteri dalam menggalakkan kesedaran tentang gangguan seksual di kalangan setiap lapisan masyarakat.**

(B) PELAKSANAAN PROGRAM JERAYAWARA KASIH KPWKM
@ADVOKASI ANTIGANGGUAN SEKSUAL

Puan-puan, tuan-tuan, hadirin yang saya kasahi sekalian.

21. Pelaksanaan Program Advokasi Antigangguan Seksual ini diharapkan agar dapat mencapai objektif seperti berikut: -

- (i) **Memberikan pendedahan** dan pengetahuan kepada masyarakat mengenai gangguan seksual;

- (ii) **Menyebarkan pemakaian garis panduan** dan notis antigangguan seksual kepada semua lapisan masyarakat;
- (iii) **Menyampaikan maklumat** berkenaan bantuan dan perkhidmatan psikososial yang disediakan oleh KPWKM terutama dalam menangani gangguan seksual; dan
- (iv) **Menjalinkan kolaborasi strategik** dengan semua pihak bagi meningkatkan pencegahan dan kesedaran gangguan seksual.

22. Program ini juga bertujuan untuk memberikan kesedaran, pendidikan mengenai gangguan seksual agar **budaya menormalisasikan gangguan seksual dapat dihapuskan**. Inisiatif yang boleh dilakukan termasuk menyediakan platform latihan untuk pekerja sosial dan sukarelawan, serta **meningkatkan pengetahuan pekerja di tempat kerja tentang tindakan yang perlu diambil jika ada aduan gangguan seksual**.

23. Di samping itu, pelaksanaan Program Advokasi Antigangguan Seksual ini juga adalah **selaras dengan Akta Kerja 1955 (Pindaan) 2022 yang telah berkuatkuasa pada 1 Januari 2023** yang turut mewajibkan majikan untuk mempamerkan notis mengenai gangguan seksual di tempat kerja.
24. Justeru, KPWKM telah membangunkan **notis antigangguan seksual** yang boleh dimuat turun melalui Kod QR dan laman web Jabatan Pembangunan Wanita (JPW) untuk dipaparkan di setiap organisasi termasuk premis awam dan

swasta.

25. Sukacita saya ingin memaklumkan bahawa Program Jerayawara Kasih KPWKM @Advokasi Antigangguan Seksual ini bertujuan untuk mempromosikan perkhidmatan yang disediakan oleh jabatan dan agensi di bawah Kementerian Pembangunan Wanita, Keluarga, dan Masyarakat melalui pameran dan aktiviti-aktiviti.
26. Antara jabatan dan agensi di bawah Kementerian yang terlibat adalah Jabatan Pembangunan Wanita, Jabatan

Kebajikan Masyarakat, Lembaga Penduduk dan Pembangunan Keluarga Negara, Institut Sosial Malaysia, Lembaga Kaunseling Negara, dan Yayasan Kebajikan Negara.

27. Turut bersama dengan KPWKM pada hari ini adalah rakan strategik Kementerian seperti Pertubuhan Keselamatan Sosial (PERKESO), Jabatan Bantuan Guaman (JBG) dan Agensi Kaunseling Dan Pengurusan Kredit (AKPK).

28. Di kesempatan ini, saya juga memohon kepada hadirin sekalian untuk berkongsi maklumat mengenai Advokasi Antigangguan Seksual kepada keluarga, sanak saudara serta rakan-rakan sebagai usaha untuk memberikan kefahaman kepada masyarakat di dalam komuniti kita.

(C) HARAPAN

Tuan-tuan, puan-puan, hadirin yang saya kasihi sekalian,

29. Saya berharap dengan kebersamaan **agensi Kerajaan, sektor korporat, Badan Bukan Kerajaan (NGO) serta seluruh masyarakat untuk untuk bekerjasama agar** kes gangguan seksual akan dapat dibendung dan sekaligus **menyediakan persekitaran yang selamat kepada bukan sahaja wanita malahan lelaki jua termasuk kanak-kanak dan setiap lapisan masyarakat.**

Singgah Membeli di Kuala Pilah
Membeli Nasi Buah Bidara
Gangguan Seksual adalah Salah
Kalau Berlaku Laporkan Segera

30. Saya sekali lagi ingin mengucapkan terima kasih kepada semua yang hadir pada program pagi ini.
31. Akhir kalam, dengan lafaz “Bismillahir Rahmanir Rahim”, sukacita saya melancarkan **Program Jerayawara KASIH KPWKM @Advokasi Antigangguan Seksual Negeri Sembilan**

Sekian, Wabillahi taufiq walhidayah

Wassalamualaikum warahmatullahi Wabarakatuh.

Dato' Sri Hajah Nancy binti Shukri

Menteri Pembangunan Wanita, Keluarga dan Masyarakat

10 Ogos 2023